

四庫全書

子部

欽定四庫全書

子部
稗編卷六十四
五

詳校官中書臣賈鏊

主事臣祁韻士覆勘

總校官中書臣朱鈐

校對官檢討臣王鍾健

謄錄監生臣葉椿

欽定四庫全書

稗編卷六十四

明 唐順之 撰

諸家二十二 術數

范氏筮算卜法序

吳 萊

筮算卜法者本楚越間小術也自楚屈原始稱有筮算之卜越相范蠡頗有其書然今特類後世術者所託要之亦必古有此法矣當卜時自其所向得草木枝初不計多寡左右手一縱一橫揲之以三而數用其扐然後

一時之吉凶從違休咎福禍立可見者達賢君子或棄之而不道或時有可采是豈所謂楚人鬼而越人機者乎蓋昔越相范蠡曾與大夫種事濮上計然計然世所號文子者也而蠡種實爲楚人而往仕越悉通天地陰陽之紀察日月星宿之會明鬼神幽顯之理達龜筮鈐決之與治國臨政謀敵用武莫不如其所願欲越以霸強何蠡種之能有以盡乎其術也予嘗考之大抵本出於太一六壬玄女遁甲風烏雲氣之道越王勾踐蓂吳

吳將赦越蠡占則曰王聞喜時日加戌時加卯功曹爲
騰蛇青龍在勝光是謂時尅其日用又助之事不利而
有傷已而子胥諫不果赦及越王勾踐歸國越既沼吳
而蠡去種占則曰王勿追蠡蠡去時陰畫六陽畫三後
入天一前翳神光是謂玄武天空無有止者言則死視
則狂已而蠡去勿復追吳越春秋具載其事而史記特
推蠡種之術乃出於計然然自越王勾踐之還臨明堂
悉練時日又類後世五行堪輿叢辰等家脫有不合則

指爲事犯五門初未審所謂五門者果何術也吳越春秋蓋輯於東漢趙曄或時漢季頗以天文讖緯九宮八卦占候之書爲內學而曄自以其說勦入之歟不然史記之言陰陽多忌諱而太詳者蠱種毋乃酷似之歟是故世之學爲天目計神孤單閉杜奄迫闌格制客主別勝負之術者每託於蠱而行之筵筭之卜特其細也然則陽至而陰陰至而陽陽節剛強而力疾陰節安徐而重固又且游觀乎天地四時羸縮進退以爲常是豈但

古之善用兵者爲然哉雖一恒人之欲卜其動作云爲亦不過此而已夫然故微而思慮之所形著而言行之所發至以天地之霸變鬼神之幽蹟而吉凶悔吝之來若有應焉誠有不容揜其僞者雖微端龜正策旋式布棊人心之皎然常足以先知而預定矣又况達賢君子出入起居浩乎與天同運發號施令宵乎與神俱化然且不能不假是以示諸人也筵蓍之細時有可采豈謂其果足以盡乎天人之道者哉雖然越王勾踐之陰謀

譎術苟他無所徵纖毫瑣末類出於陰陽時日之占而後用事吾猶恐其未必致霸必也五穀蓄金銀實府庫滿兵甲利然後用事以是定王心之疑動越民之所欲報讎而威敵者則庶幾焉是故今一恒人之所卜雖以民俗間小事亦必天地之氣應與人事相參乃可以見其成功不然則龜為枯骨著為朽幹猶不必泥泥筮蓍之細者哉予具錄之又足以通知古之多異術矣

軌草卦影

宗類苑

李璋太尉罷郢州入朝至襄陽疾病止驛舍兩月餘璋嘗命蜀人費孝先作軌草卦影先畫一鳳止於林下有闕焉又畫一鳳立于臺又畫衣紫而哭者五人蓋襄州南數里有鳳林闕傳舍名鳳臺驛始璋止二子侍行三子守官于外聞璋病甚悉來奔視至之朔日璋乃卒果臨其喪者五人

唐垌知諫院成都人費孝先爲作卦影畫一人衣金紫持弓箭射落一鷄垌語人曰持弓者我也王丞相生於

辛酉即鷄也必因我射而去位則我亦從而貴矣翊日抗疏以彈荆公又乞留班頗諠于殿陛上怒降堦爲太常寺太祝監廣州軍資庫以是年八月被責堦歎曰射落之鷄乃我也

自至和嘉祐已來費孝先以術名天下士大夫無不作卦影而應者甚多獨王平甫不喜之嘗語人曰占卜本欲前知而卦應驗於事後何足問耶

術士李某者亦傳管輅軌草法畫卦影頗有驗今丞相

頃嘗問之卦影畫水邊一月中有古字未幾除知湖州
又盧龍圖練使占卦影亦同乃除知渭州雖不同而其
影皆符

謝石拆字

洪邁

謝石潤夫成都人宣和間至京師以拆字言人禍福求
相者但隨意書一字即就其字離拆而言無不奇中者
名聞九重上皇因書一朝字令中貴人持往試之石見
字即端視中貴人曰此非觀察所書也然謝石賤術據

字而言今日遭遇即因此字點配遠行亦此字也但未
敢遽言之耳中貴人愕然曰但有所據盡言無懼也石
曰朝字離之為十月十日字非此月此日所生之天人
當誰書也一座盡驚中貴馳奏翊日召至後苑令左右
及宮嬪書字示之皆據字論說禍福俱有精理補承信
郎四方求相者其門如市有朝士妻懷妊過月手書一
也字令夫持問石曰此閨中所書否曰何以言之曰謂
語助者焉哉乎也固知是公內助所書尊聞盛年三十

一否曰是也以也字上爲三十下爲一字然吾官寄此當力謀遷動而不可得否曰正以此爲撓耳蓋也字著水則爲池有馬則爲馳今池運則無水陸馳則無馬是安可動也又尊聞父母兄弟近身親人無一存者以也字著人則一他字今獨見也字而不見人故也又尊聞其家物產亦當蕩盡否以也字著土則爲地字今又不見土也曰然但此皆非所問者賤室以懷妊過月憂而問耳曰是必十三箇月也以也字中有十字并兩傍二

豎下一畫爲十三也有一事涉奇怪欲不言則公所問
正決此事可盡言否朝士請其說曰也字著虫爲蛇字
今尊聞所妊殆蛇妖也然不見虫豸則不能爲害石亦
有藥可爲公驗之朝士異其說因請至家以藥投之果
下百數小蛇而體平都人盡共神之而不知其竟挾何
術也

靈棋經

馬端臨

通考載靈棋經二卷晁氏曰漢東方朔撰又曰張良劉

安未知孰是晉顧幼明宋何承天注有唐李遠叙歸來子以爲黃石公書豈謂以授良者耶按南史載客從南來遺我良財寶貨珠璣金盞玉盃之繇則古之遺書也明矣凡百二十卦

晉襄城道人常法和所傳靈棋經或謂其先張子房受於黃石公而東方朔得之以爲占兆者也自淮南八公以後秘而不得傳至晉太康中始有衣黃皮老翁以竹筒盛此經授之法和其法以十二棋刻一面上中下各

刻四棋一擲計其所得一二三四之數一爲陽二爲陰
三爲重陽四爲重陰以上中下分天地人三位猶易三
爻而成卦也或有上中而無下或有中下而無上或有
上下而無中或止一位或漫而無字凡一百二十五卦
雖以陰陽位次推斷吉凶而卦立別名自爲一術蓋擬
太玄而識尤淺陋者也然在南史已載經中客從南來
遺我良才寶貨珠璣金盞玉盃之繇則此經自晉傳來
信矣宋藝文志五行類有靈樞經一卷其即唐志東方

朔之占書乎故晁氏曰東方朔撰晉顏幼明宋何承天
註唐李遠叙今觀其繇皆鄙俚類非晉宋以前有道者
文字其必漢魏之季五行家所作而依託東方氏以為
重歟顏何之註亦無取焉若李遠之叙意亦偶因一時
靈驗而發耳觀元儒胡一桂著翼傳外篇歷叙諸家卜
筮之書自太玄以下洞林皇極元包潛虛之類無不論
述而獨不及此經得非以其無關於大道而不足錄耶

靈棋經解序

劉基

昔者聖人作易以前民用靈棋象易而作也易道奧而難知故作靈棋以象之雖不足以盡易之蘊然非精於易者又烏能為靈棋之辭也哉靈棋之式以三為經四為緯三以上為天中為人下為地上為君中為臣下為民以一為少陽二為少陰三為老陽四為老陰少陽與少陰為耦而太陽與太陰為敵得耦而悅得敵而爭其常也或失其道而耦反為仇或得其行而敵反為用其變也陽多則道同而相助陰多則志異而相乖君子小

人之分也陰陽迭用體有不同而名隨之異變易之道也易之取象曰車曰馬曰桶曰矢曰鬼曰狐之類推而達之天下之物無不該矣曰馬矣而又化爲龍曰水矣而又以爲雲變易之義也非通天下之賾者不識也故曰靈棋象易而作也非精於易者不能也予每喜其占之驗而病解之者不識作者之旨而以世之卜師之語配之故為申其意而為之言若夫以爲黃石公之授張子房則傳無其文史無其實不敢從而附會之也

龜策傳

史記

宋元王二年江使神龜使於河至於泉陽漁者豫且舉網得而囚之置之籠中夜半龜來見夢於宋元王曰我為江使於河豫且得我身在患中莫可告語王有德義故來告訴元王惕然而悟乃召博士衛平而問之衛平乃援式而起對曰今昔壬子宿在牽牛河水大會鬼神相謀漢正南北江河固期南風新至江使先來白雲雙漢萬物盡留斗柄指日使者當囚玄服而乘輜車其名

爲龜王使人馳而往問泉陽令與使者問豫且即獻使
者使者載行出於泉陽之門正晝無見風雨晦冥雲蓋
其上五采青黃雷雨並起風將而行入於端門見於東
廂身如流水潤澤有光望見元王延頸而前三步而止
縮頸而却復其故處元王見而怪之問衛平對曰延頸
而前以當謝也縮頸而却欲亟去也元王曰善哉趣駕
送龜衛平曰龜者天下之大寶也先得此龜者爲天子
且十言十當十戰十勝王能寶之諸侯盡服王勿遺也

元王曰龜在患難中以我爲賢德忠信故來告寡人寡人若不遣也是漁者也漁者利其肉寡人貪其力下爲不仁上爲無德奈何勿遣衛平對曰不然臣聞盛德不報重寄不歸天與不受天奪之寶王雖遣之江河必怒務求報仇淫雨枯旱其罰必來王勿遣也元王慨然而嘆曰暴得者必暴亡彊取者必後無功寡人安事此寶趣駕送龜勿令久留衛平對曰人或忠信而不如誕謾或醜惡而宜大官或美好佳麗而爲衆人患今龜使來

抵網而遭漁者得之見夢自言是國之寶也王何憂焉
元王曰禍不妄至福不徒來福之至也人自生之禍之
至也人自成之今寡人之邦居諸侯之間舉事不當又
安亡逃衛平對曰龜大寶也爲聖人使傳之賢士不用
手足雷電將之風雨送之流水行之侯王有德乃得當
之今王有德而當此寶恐不敢受王若遣之宋必有咎
後雖悔之亦無及已元王大悅於是擇日齋戒乃刑白
雉驪羊以血灌龜於壇中央以刀剝之身全不傷使工

占之所言盡當元王之時衛平相宋宋國最強龜之力也故云神龜能夢於元王而不能自出漁者之網身能十言盡當不能通使於河還報於江賢能令人戰勝攻取不能自解於刀鋒免剝刺之患聖能先知亟見而不能令衛平無言言事百全至身而寧當時不利又焉事賢賢者有恒常士有適然是故明有所不見聽有所不聞人雖賢不能左畫方右畫圓日月之明而時蔽於浮雲又奈何責人于全孔子聞之曰神龜知吉凶而骨直

空枯日爲德而君於天下辱於三足之鳥月爲刑而相

佐見食於蝦蟆蝟辱於鵲

蝟能制虎見鵲仰地

騰蛇之神而殆於

即且

即且似蝗大腹食蛇腦

黃金有疵白玉有瑕事有所疾亦有

所徐物有所拘亦有所據罔有所數亦有所踈人有所貴亦有所不如物安可全乎

龜卜之法

儲詠

龜卜之法自古有之周官立龜人之職洪範叙稽疑之疇太史著龜策之傳理不可廢自官失其守世莫有精

其術者洪範所載曰雨曰霽曰蒙曰驛曰克而食墨不
食墨之說未聞焉太史公分四時而定吉凶以橫正安
節觀其身以脢開俛太觀其首足而雨蒙之說不及焉
今之龜人又不過定五鄉動靜首足脢直而已小得大
遺莫詣其興然其說亦復有三焉一兆固有五鄉首甲
乙而足壬癸此舉世之所通用或以日辰為祖而定五
鄉之變如丙丁日則首起丙丁而次戊己庚辛居戊己
之中位甲乙乃居足焉十干皆然而甲乙之日乃居甲

乙之正位謂古人以甲乙日爲起例而後人遂以爲定例也或又以本位爲祖而變五鄉之用如腰金之兆金位也則以甲乙爲財爻金克木也以丙丁爲官鬼火克金也木兆則以戊己鄉爲財爻庚辛鄉爲官鬼其說尤爲合理而又有一法則以五鄉之動者察其爲金木水火土之象隨本鄉而定吉凶如甲乙之鄉動而有金之象則爲官鬼有水之象則爲父母戰則不祥相生則吉所謂動者驛也戰者克也霽者食墨也蒙者不食墨也

太史公以四時定吉凶其亦日辰變五鄉之義乎世無
造妙之學其孰從而質之

龜經

柴望

後同

甲乙

兆金

正形云甲乙象一頭高身旺足管是為正當依

鄉之兆否則拗鄉其拗處是動詳其爻占斷以吉凶

丙丁

兆火

正形云丙丁象丁頭足齊平是為正當依鄉之

兆否則拗鄉其拗處是動詳以爻占斷以吉凶

腰金甲乙

兆水

正形云頭平身直旺足管如蛾眉覆月之

狀是爲正當依鄉之兆否則拗鄉其拗處是動詳以斷之

腰金丙丁木兆正形云亦如腰金甲乙同

上鄉木兆一名坐脉正形云宜如木形而活根柱堅牢而麓

是爲正當依鄉或頭野或頭回或頭就或身靠或身空看所占事情如何禱祝否則爲拗鄉其拗處動也

下鄉倒龍木兆名應針正形云如上木兆同倒龍者如倒掛

龍也其形要活又名懸針者如倒掛針也其形要直二

名總言直而活也有云下木兆者蓋二兆者俱屬木其形無二也否則拗鄉其拗處便是動看其動而斷之

兌才

三邊俱是火兆

正形云此卦乃水鄉發火故要頭起身重

足發如仰月形又如船載物形故名兌才也詳其爻占斷以吉凶

春灼後左夏灼前左秋灼前右冬灼後右其後左者乃下丙丁也是寅卯之位故爲木兆前左者乃上丙丁也是巳午之位故爲火兆前右者乃上甲乙也是申酉之

位故爲金兆後右者乃下甲乙也是亥子之位故爲水兆

輕清者細身靜秀麗也

輕清宜占脫事

求晴不宜求雨

平者頭足無高下也

平直事須逢吉平

安無咎

直者不曲也不斜也

伏者頭足垂下也

伏凡事見遲

難脫亦難成病難痊

高者頭易起也

高頭

小見成宜進身無咎足高宜財價高

低者頭之垂也

低頭無氣

身主遲滯足無氣價廉

野者頭向外不回顧也

野難成

好脫宜出占吉
不吉凶不凶

就者向內不肯也

就易成難脫宜入

回者頭高而再轉也

回易成難脫宜進

臨者頭低也

低同占

戴白頭之白也

戴白主體廢主孝服

垂者伏也低也

低同占

纖活反足也

而回也

纖活凡事皆吉

有情回顧和順也

有情凡事吉

昂者起仰也高也

淒如水滴下也渾蒙也

淒雖遲滯宜

占財田占病主重

休囚者蒙昧也

休囚凡事不利

生我者吉克我者凶

暗作事暗損

旺相者洪潤明靜也

洪謀事有氣明作

事皆利

拗者不依鄉也

拗凡事皆不利

乖違者拗鄉也

乖違主事皆不利也

靜者六爻不動也

靜不宜求動宜

求靜只守舊

摺者四疊也

摺凡事轉摺進退迂迴

折者斷也

折凡事不利旺中有損

顛狂者起伏大也

枯朽者休囚也

枯朽凡事暴凶

衰者無力細微也

震者大動也

震有吉有凶不能靜

驛者微動也

驛與健同不宜守舊

豁者喜也召也

豁宜脫事

不宜成事防走不宜止

發者大起也

豁同占

落者足垂垂也

垂同占

滯者足下重也

滯凡事遲滯不宜脫事

蕾者如疊蕾也綿續也

蕾下凶上吉

蛀者如虫生又

昂者欲上也

蛀凡事不利

促者摺折也

促與折同凡事不長

縱橫者枝利也

縱橫駭雜不順阻滯

窈窕者進退之形也

窈窕進退凡事未有一定

枝者生枝也

枝有凶有吉

浮者微起也

發同占

脫者發不管也

與落稍同

鈴者平伏清歌而管也

鈴難脫宜成也

管者鈴也

鈴同占

漏者落也枝下垂也

落同占

剛者堅也齊者平也

剛齊無咎有吉

夾絲者中破也

夾絲凡事不利

拖者枝生外也

墜者枝生內也

拖墜能凶能吉

推六神行法配入五鄉飛換例

凡此法陽月從甲乙數至壬癸陰月從下壬癸至甲乙爲例

陽月 寅辰午申戌子 陰月 卯巳未酉亥丑

陽月 六神橫看 陰月 六神橫看

乙巳

丁酉

己亥

辛丑

癸卯

甲乙青龍用事

雀勾蛇虎武

丙丁朱雀用事

勾蛇虎武龍

戊己勾陳用事

蛇虎武龍雀

己日螣蛇用事

虎武龍雀勾

庚辛日白虎用事

武龍雀勾蛇

壬癸日玄武用事

龍雀勾蛇虎

乙甲

丁丙

己戊

辛庚

癸壬

甲乙青龍用事

武虎蛇勾雀

丙丁日朱雀用事

龍武虎蛇勾

戊日勾陳用事

雀龍玄虎蛇

己日騰蛇用事

勾雀龍玄虎

庚辛日白虎用事

蛇勾雀龍玄

壬癸日玄武用事

虎蛇勾雀龍

陶沙見金

占者以方來之事叩之於神卜之卦爻灾祥有准者在
乎誠敬而已誠者無一念不實敬者無一念不誠誠本

於心心契於神神機於卦卦成則有像有像則有兆有兆則有理動則變變則吉凶生焉飛換之說亦本乎日辰動爻之中變見所以取金木水火土定五屬父母子孫兄弟財鬼以日辰起六神龍雀勾蛇虎武係於六爻之間有飛有換灼然可見或飛動自吉而向凶或自凶而趨吉各以類斷者如乾為天為圓為君為父為玉為金坤為地為母為布之類又如青龍主喜朱雀主訟玄武主盜之類蓋離宮白虎見主甲冑兵戈之事兌宮朱

雀見為公訟口舌之非坎宮玄武見為盜失之像故飛
換之訣不外乎象不離乎理妙可通神不傳之圓機一
事一理貫通更不疑諸家秘訣有此卦則知有此象知
有此象則理數昭然吉凶悔吝由而推之萬無一失

六神論解

先定五行

五行者金木水火土也

次論六神

六神者龍雀勾虎蛇武也雖
然有吉有凶尤看相生相克

虎伏南山爪牙退縮

南山火鄉虎屬金遇之無
氣不能為禍一云主外服

龍眠東海頭角嶸崢

東海水鄉龍屬水遇之主財利大獲春夏尤甚秋冬平平

朱雀起炎而招禍

朱雀屬火又入火鄉其禍愈大官災並見春夏尤甚

螣蛇抱木以興災

螣蛇屬火入木受生主人口有災家宅不寧

失財因玄武之燒身

玄武屬水入火為禍主損財

退產緣勾陳之倚樹

勾陳屬土入木受傷主退產因田土之事

可畏者啣刀之猛獸

白虎入金則盛必致災禍主脚足痛刀斧血光跌撲折傷之災

可喜者戲水之青龍

青龍入水主喜進財添人產生婚姻六甲名利遂成之事

朱雀投江塞翁失馬

朱雀入水受制則禍變為福大事成小先失後收又云臨人防患病

螣蛇入宅牧人夢魚

螣蛇入土穴不能爲毒仍主人家豐富

賊擾玄武足巡河

玄武入水則盛主賊盜陰謀失財小人女子受欺又主水厄不利

病怕勾陳之獻寶

勾陳入金主疾病遷延服藥未效又主口舌之事

卜商喪子皆因虎渡南河

白虎入水反主不利小口又主瘟疫時氣

莊子哭妻蓋為龍蟠麗水

青龍入金受克不利陰人及陰人婚姻六甲之事

朱雀啣金憂口舌

朱雀入金相克主口舌仍得薄才橫物因才起事防官事

螣蛇赴火慮嬰兒

螣蛇入火主小口灾忌陽火之厄蛇犬血光之灾

莫逢探海之勾陳

勾陳入水相克主瘡痂血光或塘水河決之事有氣主進產業

勾遇攀枝之玄武

玄武入水反生座
婦灾忌樹木之厄

見龍在田陶朱進喜

青龍入土主進才
一切之事皆喜

老虎嘯岩馮婦添憂

白虎入土主人宅
不利定母有灾

螣蛇破浪以施威

螣蛇入水則不靜主孕婦
不利忌水灾春夏盛秋平

朱雀銜泥而作毒

朱雀入土及生主公門文
書動春平夏凶秋冬平

勾陳吹火楊妃有害齒之憂

勾陳入火主婦人齒痛
逆留或爭山田之事

玄武貪財郭巨有得金之喜

玄武入金主才在外
旺又云女人人口舌

渴龍燒尾父母驚惶

青龍入火主子孫
灾驚一云進六畜

卧虎入林門庭凶變

虎入木主家宅生橫禍喪服血光之灾

訟怕勾陳之塞穴

勾陳入土主官家文書主田園山林起爭訟事

病嫌玄武之登壇

玄武入土主疾病進滯忌盜賊侵損

騰蛇吞寶以非宜

入金主女人病有卒暴及飲食中得灾家宅目疾

朱雀穿林而尚可

朱雀入木成得小利主不寧之事小可不出

若論六神之凶吉須察事意之輕重要察休囚生旺之

鄉更分金木水火土之位熟明此理禍福無差

卜論

李華

天地之大德曰生舜好生之德洽于人心五福首乎壽
麟鳳龜龍謂之四靈龜不傷物呼吸元和於介蟲為長
而壽古之聖者剝而腴之觀其裂畫以定吉凶殘其生
勦其壽既勦殘之而求其靈夫何故愚未知夫天地之
心聖達之謨靈之壽之而夭戮之腴其肉鑽其骸精氣
復於無物而貞悔發乎焦枯不其妄耶夫大人與天地
合其德與日月合其明與四時合其序與鬼神合其吉
凶不當妄也壽而夭之豈合其德乎因物求徵豈合其

明乎毒靈介而徵其神豈合其序乎假枯殼而決狐疑
豈合其吉凶乎洪範曰爾有大疑謀及卜筮聖人不當
有疑於人以筮也夫祭有尸自虞夏商周不變戰國蕩
古法祭無尸尸之重重於卜則明廢龜可也又聞夫鑄
刀劍者不成則屠犬彘而祭之被髮而哭之則成而利
蓋不祥器也其神者躍為龍蛇穿木石入泉源以至發
烟光聲音人不能自神因天地之氣化天地之物而為
神固無悲然是亦為恠古者成宮室必落之鐘鼓器械

必釁之豈神明貴殺享腥臠歟今亡其禮未聞屋室不安身而器物不利用由是而言則卜筮陰陽之流皆妄作也夫潔壇墀而布精誠求福之來緬不可致耕夫蠶婦神一草木禱一禽畜鼓而舞之謂妖祥如答實歟妄歟犧文之易更周孔之述以為至矣揚子雲為太玄設卦辨吉凶如易之告若使後代有如揚子雲又為一書可筮則象數之變其可既乎專任道德以貫之則天地之理盡矣又焉假夫著龜乎又焉徵夫鬼神乎子不語

是存乎道義也

卜流不一

卜之流雜見書傳虎卜紫姑卜牛蹄卜灼骨卜鳥卜雖不法於著龜亦有可稱者焉

論卜筮

沈括

今之卜筮皆用古書工拙繫乎用之者唯其寂然不動乃能通天下之故人未能至乎無心也則憑物之無心者而言之如灼龜璽瓦皆取其無心也

古之卜者皆有繇辭周禮三兆其頌皆千有二百如鳳
凰于飛和鳴鏘鏘間于兩社為公室輔專之渝攘公之
渝一薰一蕕十年尚猶有臭如魚竄尾衡流而方羊裔
焉大國滅之將亡闔門塞竇乃自後踰大橫庚子為
天王夏啓以光之類是也今此書亡矣漢人尚視其體
今人雖視其體而專以五行為主三代舊術莫有傳者
洪範七稽疑擇建立卜筮人有龜從筮從之說禮記卜
筮不相襲謂卜不吉則又筮筮不吉則又卜以為瀆龜

筮左傳晉獻公欲以驪姬為夫人卜之不吉筮之吉公
曰從筮卜人曰筮短龜長不如從長魯穆姜徙居東宮
筮之遇艮之八史曰是謂艮之隨杜預注云周禮大卜
掌三易雜用連山歸藏二易皆以七八為占故言遇艮
之八史疑古易遇八為不利故更以周易占變爻得隨
卦也

建除

洪邁

建除十二辰史漢厯書皆不載日者列傳但有建除家

以為不吉一句惟淮南鴻烈解天文訓篇云寅為建卯
為除辰為滿巳為平主生午為定未為執主臨申為破
主衡酉為危主杓戌為成主少德亥為收主大德子為
開主太歲丑為閉主太陰今會元官厯每月遇建平破
收日皆不用以建為月陽破為月對平收隨陰陽月遞
互為魁罡也酉陽雜俎夢篇云周禮以日月星辰各占
六夢謂日有甲乙月有建破今注無此語正義曰案堪
輿黃帝問天老事云四月陽建於巳破於亥陰建於未

破於癸是為陽破陰陰破陽今不知何書所載但又以十干為破未之前聞也

差穀

草木子

差穀古有其說也其法最畧古惟有剛柔二日內事用柔日外事用剛日及漢用寶義制伐德五日其法以六十甲子以上下生尅推之猶未離乎二氣五行者也及唐百忌歷行其拘忌愈繁陰陽愈亂吉凶愈無憑也惑世誣民於斯為甚識者取其昭然有理者可也不必盡

法也

稗編卷六十四

欽定四庫全書

稗編卷六十五

明 唐順之 撰

諸家二十三

術數

月忌

周密

野語曰俗以每月初五十四二十三為月忌凡事必避之其說不經後見衛道夫云問前輩說此三日即河圖數之中宮五數耳五為君象故民庶不可用此說頗有理因圖於此四初四十三二十二日三初三十二二十

一日八初八十七日九初九日十八日五初五十四二
十三日一初一初十十九日二初二十一二十日七初
七十六日六初六十五日

古者卜日未嘗擇日

熊朋來

古者昏葬卜日而未嘗擇日故陰陽拘忌之說不至惑
人以春秋所書考之莊二十四年八月丁丑姜氏入是
年歲次辛亥八月丙子朔乃初二日也八月為夏正六
月初不以月破為嫌文二年二月丁丑作僖公主二月

為夏正十二月亦不以月建為嫌至於葬則經多書其
日推莊九年七月丁酉葬齊襄公閔元年六月辛酉葬
莊公文十八年六月癸酉葬文公成元年二月辛酉葬
宣公於後世葬日為通如隱三年十二月癸未葬宋穆
公桓十七年八月癸巳葬蔡桓侯十二月巳丑葬桓公
莊四年六月乙丑葬紀伯姬二十二年正月癸丑葬文
姜三十年八月癸亥葬紀叔姬僖二年五月辛巳葬哀
姜十八年八月丁亥葬齊桓公二十七年八月乙未葬

齊孝公三十三年四月癸巳葬晉文公文元年十一月
丁巳葬僖公五年三月辛亥葬成風九年二月辛丑葬
襄王十七年四月癸亥葬聲姜宣八年十月己丑葬敬
嬴成三年正月辛亥葬衛穆公二月乙亥葬宋文公十
五年八月庚辰葬宋共公十八年十二月丁未葬成公
襄二年七月己丑葬齊姜四年八月辛亥葬定姒九年
八月癸未葬穆姜昭七年十二月癸亥葬衛襄公十一
年九月己亥葬齊歸定元年七月癸巳葬昭公十五年

九月丁巳葬定公雨不克葬戊午乃葬十月辛巳葬定
似是皆不合後世葬日丁巳雨不葬而戊午葬古人未
嘗拘忌可見陰陽家擇日古人所不論但卜日取吉而
已春秋之葬惟莊公以子般卒而葬緩餘或逾月或三
四月即葬後世為陰陽拘忌至數年不葬曷不觀于春
秋乎

呂才卜宅雜論

杜佑

初貞觀中呂才為太常博士與諸陰陽學者十餘人撰

陰陽書凡五十三卷并舊書行者三十七卷詔頒下之才病其有穿鑿拘忌者故著論曰易曰上古穴居而野處後世聖人易之以宮室蓋取諸大壯逮於殷周之際乃有卜擇之文故詩稱相其陰陽書云卜惟洛食此則卜擇吉凶其來尚矣至於近代師巫更加五姓之說言五姓者謂宮商角徵羽天下萬姓悉揔配之行事吉凶依此為法至如張王等為商武庚等為羽欲以同韻相求及其以柳姓為宮以趙姓為角又非四聲相管其間

亦有同是一姓分屬宮商復有複姓數字徵羽不別驗
於經典本無斯說諸陰陽書亦無此語直是野俗口傳
竟無所出之處唯按堪輿經云黃帝對於天老乃有五
姓之言且黃帝之時不過姬姜數姓暨於後代賜族者
多至如管蔡郕霍魯衛毛昺郇雍曹滕畢原鄆郇並是
姬姓子孔殷宋華向蕭亳皇甫並是子姓苗裔自餘諸
國准例皆然因邑授官分枝布葉未知此等諸姓是誰
配屬宮商又檢春秋以陳衛及秦並同水族齊鄭及宋

皆為火姓或承所出之祖或繫所屬之星或取所居之地亦非宮商角徵共相管攝此則事不稽古義理乖僻者也又叙祿命曰謹按史記宋忠賈誼司馬季主云夫卜筮高談祿命以悅人心矯言禍福以盡人財又按王充論衡云見骨體而知命祿觀祿命而知骨體此則祿命之書行之久矣多言或中人乃信之今更研尋本非實錄但以積善餘慶不假建祿之吉積惡餘殃豈由劫殺之灾皇天無親常與善人惡之所應其猶影響故有

夏多罪天命勦絕宋景修德妖孛夜移學也祿在其中
豈得生當建命武王憂勤損壽不聞月值空亡長平坑
卒未聞共犯三刑南陽貴士何必俱當六合歷陽成湖
非獨河魁之上蜀郡炎燎豈由灾厄之下今時亦有同
建祿而貴賤懸殊共命胎而夭壽更異按春秋魯桓公
六年九月魯莊公生今按長歷莊公生當乙亥之歲建
申之月以此推之莊公乃當祿之空亡依祿命書法合
貧賤又犯勾絞六害背驛馬生身尅驛馬三刑當此生

者並無官爵火命七月生當病鄉為人尪弱身合矮陋
今按齊詩譏莊公猗嗟昌兮頎而長兮美目揚兮巧趨
踰兮唯有向命一條法當長壽依檢春秋莊公薨時計
年四十五矣此則祿命不驗一也又按史記秦莊襄王
四十八年始皇帝生宋忠注云因正月生為此名政依
檢襄王四十八年歲在壬寅此年正月生者命當背祿
法無官爵假得六合奴婢尚少始皇又當破驛馬生驛
馬三刑身尪驛馬法當望官不到金命正月生當絕下

絕下為人無始有終老而彌吉今驗史記始皇乃是有
始無終老更彌凶唯建命生法合長壽計其崩時不過
五十祿命不驗二也檢漢武故事武帝以乙酉歲七月
七日平明時生亦當祿空亡下法主無官爵雖向驛馬
尚隔四辰依祿命法少無官爵老而方盛今驗漢書武
帝即位年始十六末年以後戶口減半祿命不驗三也
又檢後魏書云孝文帝皇興元年八月生今按長厯其
年歲在丁未以此推之孝文背祿背命并驛馬三刑身

尅驛馬依檢祿命書法無官爵命當父死中生法當生
不見父今檢魏書孝文身受其父之禪禮云嗣王位定
在於初喪踰年之後方始正號是以天子無父事三老
也孝文受禪異於常禮躬為天子以事其親而祿命倒
云不合見父祿命不驗四也又按沈約宋書云宋高祖
癸亥三月生依此而推祿之與命並留空亡依祿命書
法無官爵又當於墓中生唯宜嫡子假有次子法當早
卒今檢宋書高祖長子先被篡殺次子義宗享國多年

高祖又當祿命墓下生法得嫡孫財祿今檢宋書其孫
劉邵劉濬並為篡逆幾失宗祧祿命不驗五也叙塋書
曰易曰古之塋者厚衣之以薪不封不樹喪期無數後
代聖人易之以棺槨蓋取諸大過禮云塋者藏也欲使
人不見之然孝經云卜其宅兆而安厝之以其復土事
畢長為感慕之所宅窆禮終永作寃神之宅朝市遷變
豈得先測於將來泉石交侵不可見知於地下是以謀
及龜筮庶無後艱斯乃備於慎終之禮曾無吉凶之義

暨于近代以來加之陰陽葬法或選年月便利或量墓
田遠近一事失所禍及生人巫者利其貨賄莫不擅加
利害遂令葬書一術乃有百二家各說吉凶拘而多
忌且天覆地載乾坤之理備焉一剛一柔消息之義詳
矣或成於晝夜之道感於男女之化三光通於上四氣
通於下斯乃陰陽之大經不可失之於斯須也至於喪
葬之吉凶乃附此為妖妄傳云王者七日而殯七月而
葬諸侯五日而殯五月而葬大夫經時而葬士則踰月

而已此則貴賤不同禮亦異數欲使同盟同軌赴弔有
期量事制宜遂為常式法既一定不得違之故先期而
塋謂之不懷後期而不塋譏之殆禮此則塋有定期不
擇年月一也春秋又云丁巳塋定公而不克塋至於戊
午襄事禮經善之襄成也雨而成事若汲汲於欲塋禮
記云卜塋先遠日蓋選月終之日所以避不懷也今檢
塋書以己亥之日用塋最凶謹按春秋之際此日塋者
凡有二十餘人此則塋不擇日一也禮記又云周尚赤

大事用平旦殷尚白大事用日中夏尚黑大事用昏時
鄭玄注云大事者何謂喪葬也此則直取當代所尚不
擇時之早晚春秋云鄭卿子產及子太叔葬鄭簡公於
時司墓大夫室當塋路若壞其室即平明而塋不壞其
室即日中而塋子產不欲壞室欲待日中子太叔云若
至日中而塋恐久勞諸侯大夫來會塋者然子產既云
博物君子太叔乃為諸侯之選國之大事無過喪葬必
若義有吉凶斯等豈得不用今乃不問時之得失唯論

人事可否曾子問云塋逢日蝕舍於路左待明而行所以備非常也若依塋書多用乾艮二時並近半夜此即反與禮違今檢禮傳塋不擇時三也塋書云富貴官祿皆由安塋所致壽命延促亦由墳壠所招然今按孝經云立身行道揚名於後世以顯父母易曰聖人之大寶曰位何以守位曰仁是以日慎一日則澤及於無疆苟德不逮而人無援以此則非由安塋吉凶而論福祚延促臧孫有後於魯不關塋得吉日若教絕祀於荆不由

遷厝失所此則安塋吉凶不可信用其義四也今之喪
塋吉凶皆依五姓便利古之塋者並在國都之北兆域
既有常所何取姓墓之義趙氏之塋並在九原漢之山
陵散在諸處上利下利蔑爾不論大墓小墓其義安在
及其子孫富貴不絕或與三代同風或分六國而王此
則五姓之義大無稽古吉凶之理何從而生其義五也
且人臣名位進退何常亦有初賤而後貴亦有始泰而
終否是以子文三已令尹展禽三黜士師卜筮一定更

不廻改塚墓既成曾不草易何因名位無時暫安故知
官爵之在人不由安葬所致其義六也野俗無識皆信
塋書巫者誑其吉凶愚人因而僥倖遂使擗踊之際擇
塋地而希官品茶毒之秋選葬時以窺財祿或云辰日
不宜哭泣遂莞爾而受弔問或云同屬忌於臨壙乃吉
服不送其親聖人設教豈其然也塋書敗俗一至於斯
其義七也

呂才為卜宅祿命卜塋之說皆以術為無驗術之不可

恃信然而不知彼皆寓也神而明之存乎其人故一術
二人用之則所占各異人之心本神以其不能無累而
寓之以無心之物而以吾之所以神者言之此術之微
難以與俗人論也才又論人姓或因官或因邑族豈可
配以宮商此亦是也如今姓敬者或更姓文或更姓苟
以文考之皆非也敬本從苟從支今乃謂之苟與文五
音安在哉此為無義不待遠求而知也然既謂之寓則
苟以為字皆寓也凡視聽思慮所及無不可寓者以此

爲妄則凡禍福吉凶死生變化孰爲非妄者能齊乎此
然後可與論先知之神矣

古人占夢

洪邁

隨筆曰漢藝文志七略雜占十八家以黃帝甘德占夢
爲首其說曰雜占者紀百家之象候善惡之證衆占非
一而夢爲大故周有其官周禮大卜掌三夢之法一曰
致夢二曰觭夢三曰咸陟鄭氏以爲致夢夏后氏所作
觭夢商人所作咸陟者言夢之得周人作焉而占夢專

為一官以日月星辰占六夢之吉凶其別曰正曰噩曰
思曰寤曰喜曰懼季冬聘王夢獻吉于王王拜而受之
舍萌于四方以贈惡夢舍萌者猶釋菜也贈者送之也
詩書禮經所載高宗夢得說周文王夢帝與九齡武王
伐紂夢協朕卜宣王考牧牧人有熊羆虺蛇之夢召彼
故老訊之占夢左傳所書尤多孔子夢坐奠於兩楹然
則古之聖賢未嘗不以夢為大是以見於七畧者如此
魏晉方技猶時或有之今人不復留意於此卜雖市井

妄術所在如林亦無一人以占夢自名者其學殆絕矣

論夢生於想

附呂氏說

劉義慶

衛玠問樂令夢云是想樂曰形神不接豈是想耶衛曰
因也樂曰未嘗夢乘車入鼠穴擣齏取鐵杵皆無想無
因故也衛思不得成病樂為解析即愈樂嘆曰此兒胃
中必無膏肓之疾呂氏曰形神相接而夢者出歸之想
形神不接而夢者出歸之因因之說曰因羊而念馬因
馬而念車因車而念蓋固有牧羊而夢鼓吹曲蓋者矣

是雖非今日之想實因於前日之想故因與想一說也
信如是說無想則無因無因則無夢舉天下之夢不出
於想而已矣然叔孫穆子夢豎牛之貌於牛未至之前曹
人夢公強之名於強未生之前是果出於想乎果出於
因乎雖然起樂廣於九原吾知其未必能判是議也

枕中記

沈既濟

開元七年道士呂翁者得神僊術行邯鄲道中息邸舍
隱囊而坐俄見少年盧生衣短褐乘青駒亦止邸中與

翁言笑盧生顧其衣裝敝壞乃歎曰大丈夫生世不謂困如此也翁曰子詎諧方適而歎其困何也生曰吾常志于學自惟青紫可拾今已過壯猶勤畎畝非困而何言訖而目昏思寐時主人方蒸黍翁乃探囊中枕以授之曰子枕吾枕當令子榮適如志其枕青甕而竅其兩端生俛首就之見其竅漸大明朗乃舉身而入遂至其家數月娶清河崔氏女女容奇麗生資愈厚明年舉進士登第釋褐轉渭南尉俄遷監察御史轉起居舍人知

制詰三載出典同州遷陝牧移節并州領河南道採訪使徵為京兆尹是歲神武皇帝方事戎狄除御史中丞河西道節度使大破戎虜歸朝冊勲恩禮極盛轉吏部侍郎遷戶部尚書兼御史大夫為時宰所忌以飛語中之貶瑞州刺史三年徵為常侍未幾同中書門下平章事關將交結圖不軌下制獄中官為保之

減死投驩州數年帝知冤復進為中書令封燕國公生五子有孫十餘人後以年逾八十病薨盧生欠伸而寤

見其身方偃於邸舍呂翁坐其旁二人蒸黍未熟生蹶然而興曰豈其夢寐也耶翁謂生曰人世之適亦如是矣生憮然良久謝曰夫寵辱之道窮達之運得喪之理死生之情盡知之矣此先生所以窒吾欲也敢不受教稽首再拜而去

大槐宮記

陳翰

淳于棼家廣陵宅南有古槐生豪飲其下因醉致疾二友扶生歸卧夢二玄衣使者曰槐安國奉邀生隨二使

上車指古槐入一穴中大城朱門題曰大槐安國有一
騎傳呼曰駙馬遠降引生升廣殿見一人衣素練服朱
華冠令生拜王王曰前奉賢尊命許令女瑤芳奉事君
子有仙姬數十奏樂執燭引進金翠步障玲瓏不斷至
一門號修儀宮一女子號金枝公主儼若神仙交驩成
禮情意日洽王曰吾南柯郡政事不理屈卿為守勅有
司出金玉錦綉僕妾車馬施列廣庭餞公至行夫人戒
子曰淳于郎好酒為婦之道貴在柔順爾善事之生累

日至爾闕吏僧道音樂來迎下車省風俗察疾苦郡中
大理凡二十載百姓立生祠王賜爵錫邑位居台輔生
五男二女榮盛莫比公主遇疾而薨生請護喪赴國王
與夫人素服慟哭於郊備儀羽葆鼓吹葬主于盤龍岡
生以貴戚威福日盛有人上表云玄象謫見國有大恐
都邑遷徙宗廟崩壞事在蕭牆時議以生僭侈之應王
因命生曰卿可暫歸本里一見親族諸孫無以為念復
令二使者送出一穴遂寤見家僮擁護于庭二客濯足

于榻斜日未隱西垣餘尊尚湛東牖因與二客尋古槐
下穴洞然明朗可容一榻上有土壤為城郭宮殿之狀
有蟻數斛二大蟻素翼朱首乃懷安國王又窮一穴直
上南枝群蟻亦處其中即南柯郡也又一穴盤屈若龍
蛇狀有小墳高尺餘即盤龍山岡也生追想感歎遽遣
填塞又風雨暴發旦視其穴遂失群蟻莫知所之國有
大恐都邑遷徙此其驗之

覺夢

列禦寇

覺有八徵夢有六候奚謂八徵一曰故二曰為三曰得
四曰喪五曰哀六曰樂七曰生八曰死此八者徵形所
接也奚謂六候一曰正夢二曰噩夢三曰思夢四曰寤
夢五曰喜夢六曰懼夢此六者神所交也不識感變之
所起者事至則惑其所由然識感變之所起者事至則
知其所以然知其所以然則無所怛一體之盈虛消息
皆通於天地應於物類故陰氣壯則夢涉大水而恐懼
陽氣壯則夢涉大火而燔燔陰陽俱壯則夢生殺甚飽

則夢與甚饑則夢取是以以浮虛為疾者則夢揚以沈實為疾者則夢溺藉帶而寢則夢蛇飛鳥銜髮則夢飛將陰夢火將疾夢食飲酒者憂歌僊者哭子列子曰神遇為夢形接為事故畫想夜夢神形所遇故神凝者想夢自消信覺不語信夢不達物化之往來者也古之真人其覺自忘其寢不夢幾虛語哉西極之南隅有國焉不知境界之所接名古莽之國陰陽之氣所不交故寒暑亡辨日月之光所不照故晝夜無辨其民不食不衣

而多眠五旬一覺以夢中所為者實覺之所見者妄四海之齊謂中央之國跨河南北越岱東西萬有餘里其陰陽之審度故一寒一暑昏明之分察故一晝一夜其民有智有愚萬物滋殖才藝多方有君臣相臨禮法相持其所云為不可稱計一覺一寐以為覺之所為者實夢之所見者妄東極之北隅有國曰阜落之國其土氣常燠日月餘光之照其土不生嘉苗其民食草木根實不知火食性剛悍彊弱相藉貴勝而不尚義多馳步少

休息常覺而不眠周之尹氏大治產其下趨役者侵晨
昏而弗息有老役夫筋力竭矣而使之彌勤晝則呻呼
而即事夜則昏憊而熟寢精神荒散昔昔夢為國君居
人民之上總一國之事遊燕宮觀恣意所欲其樂無比
覺則復役人有慰喻其勤者役夫曰人生百年晝夜各
分吾晝為僕虜苦則苦矣夜為人君其樂無比何所怨
哉尹氏心營世事慮鍾家業心形俱疲夜亦昏憊而寐
昔昔夢為人僕趨走作役無不為也數罵杖撻無不至

也眠中吟嚙呻呼徹旦息焉尹氏病之以訪其友友曰
若位足榮身資財有餘勝人遠矣夜夢為僕苦逸之復
數之常也若欲覺夢兼之豈可得邪尹氏聞其友言寬
其役夫之程減已思慮之事疾並少間鄭人有薪於野
者遇駭鹿御而擊之斃之恐人見之也遽而藏諸隍中
覆之以蕉不勝其喜俄而遺其所藏之處遂以為夢焉
順塗而詠其事傍人有聞者用其言而取之既歸告其
室人曰向薪者夢得鹿而不知其處吾今得之彼直真

夢者矣室人曰若將是夢見薪者之得鹿耶詎有薪者
邪今真得鹿是若之夢真邪夫曰吾據得鹿何用知彼
夢我夢邪薪者之歸不厭失鹿其夜真夢藏之之處又
夢得之之主真且按所夢而尋得之遂訟而爭之歸之
之士師士師曰若初真得鹿妄謂之夢真夢得鹿妄謂
之實彼真取若鹿而與若爭鹿室人又謂夢認人鹿無
人得鹿今據有此鹿請二分之一以聞鄭君鄭君曰嘻士
師將復夢分人鹿乎訪之國相國相曰夢與不夢將臣

不能辨也欲辨覺夢唯黃帝孔丘今亡黃帝孔丘孰辨之哉且恂士師之言可也

吳王占夢

越絕書

越絕曰昔者吳王夫差之時其民殷衆禾稼登熟兵革堅利其民習於鬪戰闔廬剗子胥之教行有日發有時道於姑胥之門晝卧姑胥之臺覺寤而起其心惆悵如有所悔即召太宰而占之曰向者晝卧夢入章明之宮入門見兩鑪炊而不蒸見兩黑犬嗥以北嗥以南見兩

鐸倚吾宮堂見流水湯湯越吾宮牆見前園橫索生樹
桐見後房鍛者扶挾鼓小震子為寡人精占之吉則言
吉凶則言凶無諛寡人之心所從大宰詒對曰善哉大
王興師伐齊夫章明者伐齊克天下顯明也見兩鏹炊
而不蒸者大王聖氣有餘也見兩黑犬嗥以北嗥以南
四夷已服朝諸侯也兩鐸倚吾宮堂夾田夫也見流水
湯湯越吾牆宮獻物已至則有餘也見前園橫索生樹
桐樂府吹巧也見後房鍛者扶挾鼓小震者宮女鼓樂

也吳王大悅而賜太宰韜雜繒四十疋王心不已召王
孫駱而告之對曰臣智淺能薄無方術之事不能占大
王夢臣知有東掖門亭長越公弟子公孫聖為人幼而
好學長而志遊博聞彊識通於方來之事可占大王所
夢臣請召之吳王曰諾王孫駱移記曰今日壬午左校
司馬王孫駱受教告東掖門亭長公孫聖吳王晝卧覺
寤而心中惆悵也如有所悔記到車馳詣姑胥之臺聖
得記發而讀之伏地而泣有頃不起其妻大君從旁接

而起之曰何也公孫聖仰天歎曰嗚呼悲哉此固非子
之所能知也今日壬午時加南方命屬蒼天不可逃亡
伏地而泣者不能自惜但吳王諛心而言師道不明正
言直諫身死無功大君曰汝彊食自愛慎勿相忘伏地
而書成篇即把臂而決涕泣如雨上車不顧遂至姑胥
之臺謁見吳王吳王勞曰公弟子公孫聖也寡人晝卧
姑胥之臺夢云云子為寡人精占之吉則言吉凶則言
凶無諛寡人心所從公孫聖伏地有頃而起仰天歎曰

悲哉夫好船者溺好騎者墮君子各以所好為禍諛讒
申者師道不明正言切諫身死無功伏地而泣者非自
惜因悲大王夫章者戰不勝走倖倖明者去昭昭就冥
冥見兩鑪炊而不蒸者王且不得火食見兩黑犬嗥以
北嗥以南者大王身死魂魄惑也見兩鐏倚吾宮堂者
越人入吳邦伐宗廟掘社稷也見流水湯湯越吾宮牆
者大王宮堂虛也前園橫索生樹桐者桐不為器用但
為甬當與人俱葬後房鍛者鼓小震者大息也王母自

行使臣下可矣太宰嚭王孫駱惶怖解冠幘肉袒而謝
吳王忿聖言不祥乃使其身自受其殃王乃使力士石
番以鐵杖擊殺聖後吳王果為越所敗且死曰以三寸
之帛冥吾兩目死者有知吾慚見伍子胥公孫聖也

大乾夢

羅大經

廖德明字子晦朱文公高第也少時夢謁大乾夢懷刺
候謁廟廡下謁者索刺出諸袖視其題字云宣教郎廖
某遂覺後登第改秩以宣教郎宰閬請迂者及門思前

夢恐止此不欲行親朋相勉為質之文公公曰待徐思之一夕忽叩門曰得之矣因指案上物曰人與器物不同如筆止能為筆不能為硯劍止能為劍不能為琴故其成毀久速有一定不易之數惟人則不然虛靈知覺萬理兼該固有朝為跖而暮為舜者故其吉凶禍福亦隨之而變難以一定言今子赴官但當充廣德性力行好事前夢不足芥帶子晦拜而受教後把麾持節官至正郎

神巫

列禦寇

鄭有神巫曰季咸知人之死生存亡禍福壽夭期以歲月旬日若神鄭人見之皆棄而走列子見之而心醉歸以告壺丘子曰始吾以夫子之道為至則又有至焉者矣壺子曰吾與汝既其文未既其實而固得道與衆雌而無雄而又奚卵焉而以道與世亢必信矣夫故使人得而相汝嘗試與來以予示之明日列子與之見壺子出而謂列子曰嘻子之先生死矣弗活矣不以旬數矣

吾見怪焉見濕灰焉列子入涕泣沾襟以告壺子壺子
曰鄉吾示之以地文萌乎不震不止是殆見吾杜德機
也嘗又與來明日又與之見壺子出而謂列子曰幸矣
子之先生遇我也有瘳矣灰然有生矣吾見其杜權矣
列子入以告壺子壺子曰鄉吾示之以天壤名實不入
而機發於踵是殆見吾善者機也嘗又與來明日又與
之見壺子出而謂列子曰子之先生坐不齋吾無得而
相焉試齋且復相之列子入以告壺子壺子曰吾鄉示

之以太冲莫朕是殆見吾衡氣機也鯢旋之潘為淵止
水之潘為淵流水之潘為淵濫有九名此處三焉嘗又
與來明日又與之見壺子立未定自失而走壺子曰追
之列子追之不及反以報壺子曰已滅矣已失矣吾弗
及已壺子曰鄉吾示之以未始出吾宗吾與之虛而委
蛇不知其誰何因以為茅靡因以為波流故逃也然後
列子自以為未始學而歸三年不出為其妻爨食狶如
食人於事無與親雕琢復朴塊然獨以其形立怗而封

哉一以是終

荆巫

羅隱

荆楚人淫祀者舊矣有巫頗聞於鄉閭其初為人祀也
筵席尋常歌迎舞將祈疾者健起祈歲者豐穰其後為
人祀也羊猪鮮肥清醑滿卮祈疾得死祈歲得饑里人
怨焉而思之未得適有言者曰吾昔游其家也其家無
甚累故為人祀誠心罄乎中而福亦應乎外其昨必散
之其後男女蕃息焉衣食廣大焉故為人祀誠不得罄

於中而神亦不散乎外其胙且入其家是人非前聖而後愚蓋牽於心而不復及人耳以一巫用心尚爾況異於是者乎

蠻巫咒生

洪邁

後同

莆田人陳可大知肇慶府肋下忽腫起如生癰瘡狀頃刻間大如盃識者云此中挑生毒也俟五更以菜豆嚼試若香甜則是已果然使搗川升麻取冷熟水調二大盞服之遂洞下瀉出生蔥數莖根莖皆具腫即消續煎

平胃散調補且食白粥經旬復常雷州民康財妻為蠻
巫林公榮用雞挑生值商人楊一者善鑿瘰與藥服之
食頃吐積肉一塊剖開筋脉中有生肉存已成雞形頭
尾嘴翅悉肖似康訴於州捕林置獄而呼楊生令具疾
證及所用藥略云凡喫魚肉瓜果湯茶皆可挑初中毒
覺胃腹稍痛明日漸加攪刺滿十日則內物能動騰上
則胃痛沉下則腹痛積而瘦悴此其候也在上高則取
之其法用熱茶一甌投膽礬半錢於中候礬化盡通口

呷服良久以雞翎探喉中即吐出毒物在下鬲則瀉之以米飯下鬱金末三錢毒即瀉下乃以人參白朮末各半兩同無灰酒半升納瓶內慢火熬半日許度酒熟取出溫服之日一杯五日乃止然後飲食如其故

巫術敗酒

襄陽鄧城縣有巫師能用妖術敗酒家所釀凡開酒坊者皆畏奉之每歲春秋必遍謁諸坊求丐年計十餘家率各與錢二十千則歲內平善巫偶因它事窘用又詣

富室求益拒之甚峻巫出買酒一升盛以小缶取糞污攪雜往林麓禹步誦呪環繞數匝瘞之地乃去俄酒家列甕盡作糞臭有道士曰吾有術能療但已壞者不可救耳即焚香作法半日許臭止

王弼黠巫之異

王弼字良輔秦州人游學延安北遂為龍沙宣尉司奏差弼以剛正忤上官去隱於醫至正二年黠巫王萬里與從子尚賢賣卜龍沙市冬十一月弼往謁焉忽其語

侵坐折辱之萬里恚甚驅鬼物懼弼弼夜坐讀金滕篇
忽聞窓外悲嘯聲啟戶視之空庭月明無有也翼日晝
哭於門且稱冤弼召視鬼者厭之弗能勝弼乃視曰豈
予藥殺爾邪苟非予當白爾冤鬼白兒閱人多唯翁可
託故來訴翁非有他也翁若果白兒冤宜集壽俊十人
為之徵弼曰可人既集鬼曰兒周氏女也居豐州之黑
河父和卿母張氏生時月在庚故小字為月西年十六
母疾父召王萬里占之因識其母死百有五日當至

元三年秋九月丙辰父醉卧兄樵未還兒偶步墻陰萬里以兒所生時日禁呪之兒昏迷瞪視不能語萬里負至柳林反接於樹先髻其髮纏以綵線次穴胃割心少時暨眼舌耳鼻爪指之屬粉而為丸納諸匏中復束紙作人形以呪刼制使為奴稍怠舉針刺之感額而長號昨以翁見辱乃遣報翁兒心弗忍也翁尚憐之勿使啣冤九泉兒誓與翁結為父子在坐諸父慎毋洩洩則禍相及言訖哭愈悲弼與十人者皆灑涕備書月西辭聯

署其名潛白之縣縣審之如初急速萬里叔姪鞠之始
猶撐拒月西與之相反覆甚苦且請錄其行橐遂獲符
章印書長針短針諸物萬里乃引伏云萬里廬陵人集
術至興元逢劉鍊師授以採生法大槩如月西言萬里
弗之信劉子囊間解五色帛中貯髮如彈丸指曰此咸
寧李延奴天歷二年春二月為吾所錄爾能歸錢七十
五緡當令給侍左右萬里欣然諾之劉禹步焚符祝之
延奴空中言曰師命我何之劉曰爾當從王先生游先


生仁人也殊無苦萬里如約酬錢并盡受其術復經房
州遇鄭生者與語意合又獲奉元耿頑童奴之其歸錢
數如劉今與月西為三人矣劉戒萬里終身勿近牛犬
肉近忘之因啖牛心炙事遂敗尚復何言縣移文豐州
追和卿為左驗和卿頗疑之雜處稠人內弼問誰為爾
父月西從壁隙呼曰黑衣而蒲冠者是也和卿慟月西
亦慟慟已歷叩家事慰勞如平生縣為成案上太府萬
里疾死於獄尚賢竟以賂免初弼訴縣歸親賓持壺觴

樂之忽聞對泣聲弼訶之鬼曰我耿頑童李延奴也月
西寬已伸翁寧不憫我二人耶弼叱之頑童曰月西與
翁約為父子而吾獨非翁兒女耶何相遇厚薄之不齊
也弼不得已再往縣入牒官逮頑童父德寶延奴父福
保至其所驗皆如和卿而鄺與劉不知其里居竟莫致
云自是三鬼留弼家晝相隨行夜同弼卧起雖不見形
其聲琅然弼因從容問曰衙門當有神爾曷從入月西
曰無之但見繪像懸戶上耳曰吾欲製象錢賜爾何如

曰無所用也曰爾之精氣能久存於世乎曰數至則散
矣有二僧見弼一華衣一敝衣服華衣者居右月西曰
爾為某惡行萌某邪心尚敢據人上乎彼服雖敝終為
端人耳命易其位僧失色起去頑童善歌遇弼飲則唱
漢東山及他樂府為壽弼連以酒酌地頑童輒醉應對
皆失倫客戲以醢代之頑童怒曰幾蝕吾喉吻矣何物
小子惡劇至此曉曉然數其陰事不止客慚而遁月西
尤號黯慧時與弼諸子相謔言辭多滑稽諸子或理屈

向有聲處擊之月西大笑曰鬼無形兄何必然徒見其不知也凡八閱月始寂寂無聞翰林學士承旨李好文即官中獄案造記而燕南梁載又為序其事文互有得失予乃合為一傳而其辭不雅馴者痛刪去之弼尚存年六十八矣有司誤以其能異術貢之南京上賜衣一襲遣還時洪武四年冬十二月庚辰也史官曰司馬遷云漢武帝置壽宮以奉神君神君非可得見其音與人言等時去時來來則風蕭然也予竊疑焉音麗乎形者

也無形矣音何從出哉今周女無形而能人言何其與神君類歟且自重黎絕地天通人鬼始分禹鑄鼎象物其政益備矣後世姦巫師鬼乃使之瀆亂常經其咎尚誰執哉雖然黜巫之術狡矣而卒被鬼所殺人禍天刑終不可逭為惡者盡少知懼乎抑剛正若王生鬼不敢害反敬畏之是知君子挺立天地間仰不愧也俯不忤也妖得而侮諸柰之何棄君子而弗學者衆也悲夫



稗編卷六十五

欽定四庫全書

子部
稗編卷六十六

詳校官中書臣吳璫

主事臣祁韻士覆勘

總校官中書臣朱鈐

校對官檢討臣王鍾健

謄錄監生臣葉椿

欽定四庫全書

稗編卷六十六

明 唐順之 撰

諸家二十四相

相術

宋類苑

余嘗謂風鑒一事乃昔賢甄識人物拔擢賢才之所急
非市井卜相之流用以賈鬻取資者故春秋單襄公成
肅公之徒每遇會同則先觀威儀以省禍福而前世郭
林宗裴行儉又考器識以言臧否然余亦粗知大槩嘗

與富文忠公論之大凡相之所先全在神氣與心術更
或豐厚其福十全也

非相篇

荀況

相古之人無有也學者不道也古者有姑布子卿今之
世梁有唐舉相人之形狀顏色而知其吉凶妖祥世俗
稱之古之人無有也學者不道也故相形不如論心論
心不如擇術形不勝心心不勝術術正而心順之則形
相雖惡而心術善無害為君子也形相雖善而心術惡

無害為小人也君子之謂吉小人之謂凶故長短小大
善惡形相非吉凶也古之人無有也學者不道也蓋帝
堯長帝舜短文王長周公短仲尼長子弓短昔者衛靈
公有臣曰公孫呂身長七尺面長三尺額廣三寸鼻目
耳具而名動天下楚之孫叔敖期思之鄙人也突秃長
左軒較之下而以楚霸葉公子高微小短瘠行若將不
勝衣然白公之亂也令尹子西司馬子期皆死焉葉公子
高入據楚誅白公定楚國如反手耳仁義功名善於後

世故事不揣長不揆大不權輕重亦將志乎心耳長短

小大美惡形相豈論也哉且徐偃王之狀目可瞻焉

偃仰

而不俯故以為稱瞻焉言不能俯視細物遠望瞻見也

仲尼之狀面如蒙俱周公

之狀身如斷菑臯陶之狀色如削瓜閼天之狀面無見

膚傳說之狀身如植鰭伊尹之狀面無鬚麋

同眉

禹跳湯

偏堯舜參牟

同眸

子從者將論志意比類文學耶直將差

長短辯美惡而相欺傲耶古者桀紂長巨姣美天下之

傑也筋力越勁百人之敵也然身死國亡為天下大僂

後世言惡則必稽焉是非容貌之患也聞見之不衆議
論之卑耳今世俗之亂君鄉曲之儇子莫不美麗姚冶
奇衣婦飾血氣態度擬於女子婦人莫不願得以為夫
處女莫不願得以為士棄其親家而欲奔之者比肩並
起然而中君羞以為臣中父羞以為子中兄羞以為弟
中人羞以為友俄則束乎有司戮乎大市莫不呼天啼
哭苦傷其今而後悔其始是非容貌之患也聞見之不
衆議論之卑耳

相論

曹植

世人固有身瘠而志立體小而名高者於聖則否是以堯眉八彩舜目重瞳禹耳三漏文王四乳然則世亦有四乳者此則駑馬一毛似驥耳又曰衛臣有公孫呂者身長七尺面長三尺廣三寸名震天下若此之狀蓋遠代而求非一世之異也使形殊於外道合其中名震天下不亦宜乎語云無憂而戚憂必及之無慶而歡樂必還之此心有先動而神有先知則色有先見也故扁鵲

見桓公知其將亡申叔見巫臣知其竊妻而逃也荀子
曰以為天不知人事耶則周公有風雷之災宋景有三
次之福以為知人事乎則楚昭有弗榮之應邾文無延
期之報由是言之則天道之與相占可得而知不可得
而無也

論相

杜牧

呂公善相人言女呂后當大貴宜以配季後為天子呂
后復稱制天下王呂氏子弟悉封以大國隋文帝相工

來和輩數人亦言當為帝者後篡竊果得之誠相法之
不謬矣呂氏自稱制至為后凡二十餘年間隋氏自篡
至滅凡三十六年間男女族屬殺滅殆盡當秦末呂氏
大族也周末楊氏為八柱國公侯相襲久矣且以一女
子一男子偷竊位號不三二十年間壯老嬰兒皆不得
其死不知一女子為呂氏之福耶為禍耶一男子為楊
氏之禍耶為福耶得一時之貴滅百世之族彼知相法
者當曰此必為呂氏楊氏之禍乃可為善相人矣今斷

一指得四海凡人不欲為况以一女子一男子易一族哉余讀荀卿非相因感呂氏楊氏知卿為大儒矣

雜說形貌

韓愈

談生為崔山君傳稱鶴言者豈不恠哉然吾觀於人其能盡其性而不類於禽獸異物者希矣將憤世嫉邪長往而不來者之所為乎昔之聖者其首有若牛者其形有若蛇者其喙有若鳥者其面有若蒙俱者彼皆貌似而心不同焉可謂之非人邪即有平脅曼膚顏如渥丹

美而狠者貌則人矣其心則禽獸又惡可謂之人也然則觀貌之是非不若論其心與其行事之為不失也惟神之事孔子之徒不言予將特取其憤世嫉邪而作之故題之云耳

相解

皮日休

今之相工言人相者必曰某相類龍某相類鳳某相類牛馬某至公侯某至卿相類禽獸則富貴也噫立形於天地分性於萬物其貴者不過人焉有真人形而貧賤

類禽獸而富貴哉將今之人言其貌類禽獸則喜真人
形則怒言其行類禽獸則怒真人心則喜夫以鳳為禽
耶鳳則仁義之禽也以騶虞為獸耶騶虞則仁義之獸
也今之人也仁義能符於是哉是其行又不若於禽獸
也宜矣哉或曰相者有乎哉曰上善出於性大惡亦出
於性中庸之人善惡在其化者也上善出於性若文王
在母不憂重耳弱不好弄是也大惡亦出於性若商臣
之蜂目豺聲必殺其父叔魚之虎目豕腹必以賄死是

也中庸之人善惡在其化者若大舜設化而有苗格仲尼垂諭而子路服是從善而化者也若齊桓公管仲輔之則霸豎貂輔之則亂是從惡而化者也故舜相於堯而天下平禹相於舜而大災弭咎繇相禹斯謂相者也見人知其賢愚見國知其治亂亦相也或曰賢愚者見行而知也敢問聖人之相人知其有位哉曰堯之於舜任之以天下知其有位也舜之於四凶投之於四裔知其無位也曰苟若是聖人之能相人也是必賢者得其

位不肖者不立朝三苗九黎焉得以國飛廉惡來焉得以
爵曰有是者其君不能相也將其國之是滅豈暇相人
而用哉是則三苗九黎未聞不滅飛廉惡來未聞不誅
嗚呼聖人之相人也不差忽微不失累黍言其善必善
言其惡必惡言其勝任必勝任今之人不以是術相其
心區區求子卿唐舉之術居其窮處其困不思以道達
不能以德進言其有位必齷然自負坐白屋有公侯之
姿食藜藿有卿相之色蓋不能自相其心者也或有士

居窮處困望一金之助已有沒齒之難有妄誕之人自稱精子卿唐舉之術取其金則易於反掌耳有能以聖賢之道自相其心哉嗚呼舉世從之吾獨戾也其不勝明矣

贈相士序

胡銓

有術家者流挾其術過予夸曰古稱唐舉善相人吾術得唐舉作衙官予戲之曰昔相工言楊氏當大貴已而果然不三十年楊之族屬盡殲柳宜城或言兒相夭且

賤請易業可免卒不計後竟為貞元名臣子謂楊氏果
貴耶柳氏果賤耶生默然良久曰此亦易曉也予曰訂
諸非相篇

心相

吳處厚

相形不如論心心相有三十六善不近小人不忌故舊
不念舊惡常行陰德之類三十六善全有位極人臣諺
曰有心無相相逐心生有相無心相随心滅

論形

人相篇

後同

人稟陰陽之氣肖天地之形受五行之資為萬物之靈者也故頭象天足象地眼象日月聲音象雷霆血脉象江河骨節象金石鼻額象山嶽毫髮象草木天欲高遠地欲方厚日月欲光明雷霆欲震響江河欲潤金石欲堅山嶽欲峻草木欲秀此皆大概也然郭林宗有觀人八法是也

論神

夫形以養血血以養氣氣以養神故形全則血全血全

則氣全氣全則神全是知形能養神托氣而安也氣不安則神暴而不安能安其神其惟君子乎寤則神遊於眼寐則神處於心是神出處於形而為形之表猶日月之光外照萬物而其神固在日月之內也眼明則神清眼昏則神濁清則貴濁則賤清則寤多而寐少濁則寤少而寐多能推其寤寐者可以知其貴賤也夫夢之境界蓋神遊於心而其所遊之遠亦不出五臟六腑之內與夫耳目視聽之間也其所遊之界與所見之事或相

感而成或遇事而至亦吾身之所有也夢中所見之事
乃吾身中非出吾身之外也白眼禪師說夢有五境一
曰靈境二曰寶境三曰過去境四曰見在境五曰未來
境神慄則夢生神靜則境滅夫望其形或洒然而清或
朗然而明或凝然而重然神發於內而見於表也神清
而和潤明徹者富貴之相也昏而柔弱濁結者短薄之
相也塞而靜者其神安虛而急者其神慄 詩曰神居
形內不可見氣以養神為命根氣壯血和則安固血枯

氣散神光奔英標清秀心神爽氣血和調神不昏神之清濁為形表能定貴賤最堪論

論聲

夫人之有聲如鐘鼓之響器大則聲宏器小則聲短神清則氣和氣和則聲潤深而圓暢也神濁則氣促氣促則聲焦急而輕嘶也故貴人之聲多出於丹田之中與心氣相通混然而外達丹田者聲之根也舌端者聲之表也夫根深則表重根淺則表輕是知聲發於根而見

於表也若夫清而圓堅而亮緩而烈急而和長而有力
勇而有節大如洪鐘騰韻鼙鼓振音小如玉水飛鳴雅
琴奏曲見其色則粹然而後動與其言久而後應皆貴
人之相也小人之言皆發舌端之上促急而不達何則
急而嘶緩而澁深而滯淺而燥大大則散散則破或輕
重不均嘹亮無節或崖柴而暴繁亂而浮或如破鐘之
響敗鼓之鳴又如寒鴉哺雛鵝鴈哽咽或如病猿求侶
孤鴈失羣細如蚯蚓發吟狂如青鼉夜噪如犬之吠如

羊之鳴皆賤薄之相也男有女聲單貧賤女有男聲亦
妨害然身大而聲小者凶或乾濕不齊謂之羅網聲大
小不均謂之雌雄聲或先遲而後急或先急而後遲或
聲未止而氣先絕或心未舉而色先變皆賤之相也夫
神定於內氣和於外然後可以接物言有先後之序而
色亦不變也苟神不安而氣不和則其聲失先後之序
騅色撓矣夫人稟五行之形則氣聲亦先五行之象也
故土聲深厚木聲高唱火聲焦烈水聲圓急金聲和潤

又曰聲輕者斷事無能聲破者作事無成聲濁者謀運不發聲低者魯鈍無文清冷如澗中流水者極貴發聲溜亮自覺如甕中之響者主五福全備 詩曰木聲高唱火聲焦和潤金聲最富饒吐語却如深甕裏水聲圓急韻飄飄 貴人音韻出丹田氣實喉寬響又堅貧賤不離唇舌上一生奔走不堪言 聲大無形托氣而發賤者浮濁貴者清越大柔則怯大剛則折隔山相聞圓長不缺斯乃貴人遠見風節

論氣

夫石蘊玉而山輝沙懷金而川媚此至精之寶見乎色而發乎氣也夫形者質也氣所以充乎質質因氣而宏神完則氣寬神安則氣靜得失不足以暴其氣喜怒不足以驚其神則於德為有容於量為有度乃重厚有福之人也形猶材有杞梓楸枿荆棘之異神猶工所以治材用其器聲猶器聽其聲然後知其器之美惡氣猶馬馳之以道善惡之境君子則善養其材善御其德又善

治其器善御其馬小人反是其氣寬可以容物和可以接物剛可以制物清可以表物正可以理物不寬則隘不和則戾不剛則懦不清則濁不正則偏視其氣之淺深察其色之躁靜則君子小人辨矣氣長而舒和而不暴為福壽之人急促不均暴然見乎色者為小賤之人醫經以一呼一吸為一息凡人一晝夜計一萬三千五百息今觀人之呼吸疾徐不同或急者十息緩者尚未七八而老肥者太疾幼瘦者差遲故恐古人之言猶未

盡理夫呼吸發乎顏表而為吉凶之兆其散如毛髮其聚如黍米望之有形按之無迹苟不精意以觀之則禍福無憑也氣出入無聲耳不自察或卧而不喘者為之龜息氣象也呼吸氣盈而身動近死之兆也孟子不顧萬鍾之祿能養氣者也急可欲之利悻悻然戾其色而暴氣者亦何論哉 詩曰氣乃形之本察之見賢愚小人多急躁君子則寬舒暴戾灾相及深沉福有餘誰知公輔量虛受若重湖

相骨

骨節象金石欲峻不欲橫欲圓不欲粗瘦者不欲露骨

肉不輔骨而骨露肥者不欲露肉

沉滯之人也不欲滿或滿而盈者乃是死

人之骨與肉相稱氣與血相應骨寒而縮者不貧則夭

謂背攢而體偏骨寒而肩縮大凡物有不全貧則壽富則夭故曰不貧則夭

日角之左月角

之右有骨直起為金城骨位至公卿印堂有骨上至天

庭名天柱骨從天庭貫頂名伏犀骨並位至三公

惟有其骨

亦須其色相稱方成其器苟諸位不稱雖富貴不堅

面上有骨卓起名為顴骨主

權勢顴骨相連入耳名玉梁骨主壽考自臂至肘為龍骨象君欲長而大自肘至腕名虎骨象臣欲短而細欲峻而舒圓而堅直而應節緊而不粗皆堅實之相顴骨入髮名驛馬骨左目上曰日角骨右目上曰月角骨骨齊耳為將軍骨硤目圓為龍角骨兩溝外曰巨鰲骨額中正兩邊為龍角骨又曰骨不聳兮且不露又要圓清兼秀氣骨為陽兮肉為陰陰不多兮陽不附若得陰陽骨肉停少年不貴終身富骨聳者天骨露者無立骨軟

弱者壽而不樂骨橫者凶骨輕者貧賤骨俗者愚濁骨
寒者窮薄骨圓者有福骨孤者無親又云木骨瘦而青
黑色兩頭粗大主多窮厄水骨兩頭尖富貴不可言火
骨兩頭粗無德賤于奴土骨大而皮粗厚子多而又富
肉骨堅硬壽而不樂或有旋生頭角骨者則享晚年福
祿或旋生頤額者則晚年至富也 詩曰貴人骨節細
圓長骨上無筋肉又香君骨與臣相應輔不愁無位食
天倉 骨粗豈得豐衣食祿位應無且莫求龍虎不須

相尅陷筋躔骨上賤堪憂

相肉

肉所以生血而藏骨其象猶土生萬物而成萬物者也

豐不欲有餘瘦不欲不足有餘則陰勝於陽不足則陽

勝於陰陰陽相勝謂一偏之相

肉為陰骨為陽陰有餘則生血陽有餘則生氣

肉以堅而實直而聳肉不欲在骨之內為陰不足骨不

欲生肉之外為陽有餘也故曰人肥則氣短馬肥則氣

喘是以肉不欲多骨不欲少也暴肥氣喘速死之兆肉

不欲橫橫則性剛而傾肉不欲緩緩則性柔而有滯肥
不欲亂紋露紋滿者近死之兆肉欲香而緩色欲白而
潤皮欲細而滑皆美質也色昏而枯皮黑而臭麗多加
塊非令相也若夫神不稱枝幹筋不束骨肉不居體皮
不色肉速死之應也 詩曰貴人肉細滑如苔紅白光
凝富貴來輒若如綿兼又煖一生終是少凶灾 肉緊
皮粗最不堪急如絢鼓命難長黑多紅少須多滯遍體
生毛性急剛欲識貴人公輔相芝蘭不帶自然香

論形有餘

形之有餘者頭頂圓厚腹背豐隆額濶四方紅唇齒白
耳圓成輪鼻直如膽眼分黑白眉秀蹀長肩膊齊厚胷
前平廣腹圓垂下行坐端正五嶽朝起三停相稱肉膩
骨細手長足方望之巍巍然而來視之怡怡然而生此
皆謂形有餘也形有餘者令人長壽無病富貴豐榮矣

論神有餘

神之有餘者眼光清瑩顧盼不斜眉秀而長精神聳動

容色澄澈舉止汪洋儼然遠視若秋日之照霜天巍然
近矚似和風之動春花臨事嚴毅如猛獸之步深山處
衆迢遙似丹鳳而翔雲路其坐也如界石不動其卧也
如棲鴉不搖其行也洋洋然如平水之流其立也昂昂
然如孤峯之聳言不妄發性不妄躁喜怒不動其心榮
辱不易其操萬態紛錯於前而心常一則可謂神有餘
也神有餘者皆為上貴之人凶災難入其身天祿永其
終矣

論形不足

形不足者頭尖背薄肩膊狹斜腰肋踈細肘節短促掌
薄指踈唇蹇額挺鼻仰耳反腰低胸陷一眉曲一眉直
一眼仰一眼低一睛大一睛小一顴高一顴低一手有
紋一手無紋睡中眼開言作女聲齒黃而露口臭而尖
禿頂無絲髮眼深不見睛行步欹側顏色痿怯頭小而
身上短而下長此之謂形不足也形不足者多疾而
短命福薄而賤貧矣

論神不足

神不足者不醉似醉常如病酒不愁似愁常如憂戚不
睡似睡纔睡便覺不哭似哭忽如驚悸不嗔似嗔不喜
似喜不驚似驚不癡似癡不畏似畏容止昏濁似染顛
癇神色悽愴如有所失恍惚張惶常如恐怖言語瑟縮
似羞隱藏體見低摧如遭凌辱色初鮮而後暗語初快
而後訥此皆神不足也神不足者多招牢獄枉厄官亦
主失位矣

袁柳庄雜論三篇

貴人之相有三曰聲曰神曰氣蓋聲清則神清神清則氣清驗此三者形骨次之是以古者方伎之妙有聞人之警唾而知其必貴者得之于神也有察人之喜怒操守而知其必貴者得之於氣也聲欲響濶而長神欲精粹而藏氣欲舒緩而靜反此者弗貴也若有聲而神氣不應則其貴遲有神而氣怯聲破則其貴不遠有氣而神濁聲慢未可以言貴也此三者幽而難明玄而難測

惟意所解言莫能宣也部位形骨書于中篇

形成而不可變體具而不可缺大凡形體惟在完滿隆厚清潤崇重平正華秀者不貴則富也若夫怪而粗古而露清而寒秀而薄者皆非美福古人論部位法以額準地閣左右顴為五岳以眼耳口鼻為四瀆以上下左右分為九州十二辰由此觀之則一形之微其所該也烏可淺淺而論之哉故上自天子下迨庶人其五臟六腑九竅之形皆同然其所為缺形則異也若辨析之須

於三停五行中求其要妙次求氣色左顧右盼尋根揣本則貴賤貧富吉凶壽夭灼然可見萬無一差氣色動靜著於下篇

體骨相之根本也氣色相之枝葉也根本固則枝葉繁根本枯則枝葉謝夫論相所以先究形骨而後觀其氣色此皆氣色也夫氣舒則色暢氣恬則色靜氣通則光澤華美見於色此皆氣色之善也氣偏則色焦氣滯則色枯氣蔽則憔悴黯黑見於色此皆氣色之凶也若夫

形如槁木心若死灰淡然不與世俱此又聖人之相不可以氣色論也

總論

成和子答陳希夷問曰形貌清古舉動恭勤氣清性善言根至理常有山林之趣此自修行中來形貌古怪舉止陰毒言涉邪淫常有殺伐之心此自精靈中來形貌瀟灑舉動風雅性惠氣和常存修煉之志此自神仙中來形貌秀麗舉動嚴肅性明心靈能涉造化常有虹霓

之志此自星辰中来形貌奇異舉動急速性慧氣剛言涉威福常有祭祀之心此自神祇中来未嘗有毫髮而差殊矣竊以世人以五行而取形或以飛走而取形未知孰是可得聞乎曰人稟五行之生順天地之和食天地之祿未嘗不由乎五行之所取須辨五行之形須識五行之性若以飛走取形須議得理如易取象天地風雷水火山澤八物以象八卦其取類也而有鸞鳳龍虎獅象牛馬蛇雀鵠鴨雞猪猿猴鼠狗之類各有相似龍

相嚴峻而長眼圓睛露五岳高起鳳相身細眼長清秀
額高虎形頭大額闊鼻豐口方行步重緩龜形頭尖眼
圓背伏身大犀形天庭骨聳印堂廣闊鼻仰行步面仰
急速鶴形項長胸短長身細瘦象形眼小鼻大身肥步
重猿形面小眼圓耳尖手長牛則行而緩馬則驟而急
其大畧如此人有五行之說人之有生不離乎金木水
火土之相而合其性金形主方得其五方氣色不雜精
神不亂動止規模坐久而重也木形主長得其五長氣

色不雜精神不亂動止溫柔步久而清也水形主圓得其五圓氣色不雜精神不亂動止寬容行久而輕也火形主明得其五露氣色不雜精神不亂動止敦厚卧久而安也得此五行無破者主為大富大貴之人嗟夫氣有陰陽之殊神有寒暑之政雜乎芒忽之間變而有氣神者夜則藏伏于心日則見之於眼目猶不可昏濁矣然而寂然不動視之有威謂之古澄然瑩徹視而可愛謂之秀朗然沉靜視若無神謂之藏煥然光彩視而燦

目謂之媚人得此相未有不為公卿未有不為貴人也
嗚呼似醉不醉似困不困謂之失精失靈必為貧夭且
如人有一分神一分衣祿十分神十分衣祿無神者何
足相也又有薄相之說酒薄易酸人薄易亡大凡作事
輕躁言語虛誕強為不實舉止輕狂難事言易人語先
截所厚者薄所薄者厚不睦九族親者反踈踈者反親
如此真小人也且夫貴人之相立如松坐如弓食如虎
卧如龍立欲挺直而能久身不動搖轉立轉直者貴人

也凡坐如山之穩寂然不動心廣體胖如坐山之虎經
曰坐如磐石起似浮雲凡食為性命之本以資血肉舉
筋欲徐而有序嚼物欲寬而有容凡食中不言語不喜
怒者入相啜而不響吞而不鳴食如狼虎者貴人也卧
者休息之期卧欲安靜如龍蟠如狗睡如龜息者善相
少睡易醒貴人也睡中自言語口不合出氣如馬噴槽
者多睡叫喚不醒卧沉氣粗如吼身仰如尸及伏卧者
皆下賤之相經曰少睡者貴多睡者廢故睡多則神困

也如一驚就覺一醒就精皆為聰俊之人也又有言談之說貴人之言不妄發發必有中矣言不妄陳陳必有序矣所以明達者言順剛正者言厲簡靜者言真謙恭者言微執中者言僻虛誑者言繁躁進者言妄鹵莽者言粗愚頑者言鈍陰毒者言而含笑言之所至以此驗之其言泛泛終無所成其言便便終不困滯凡人之言保乎氣貴乎神和也神和則言而有志與人之言貴乎有信貴乎有理讒言勿入耳邪言勿出口聽言以事察

則言之所以為吉與貴也

五露

五露謂眼突鼻仰唇掀耳反喉結五者是也訣曰一露
二露有衫無袴露不至五病夭窮苦五露俱全福慶縣
縣

五短

五短謂頭面身手足五相俱短也訣曰五短之人形要
小更須骨細印堂豐笏門五岳相朝拱食祿封侯有始

終

五長

五長謂頭面身手足五相俱長也訣曰五長之人骨貌
麤只緣筋骨出皮膚又嫌枯槁無滋潤衣食看來不似
初

六極

六極謂頭小額小目小鼻小耳小口小是也頭小為一
極夫妻不得力額小為二極父母少恩恤目小為三極

生平少知識鼻小為四極農作無休息口小為五極身
無刺衣食耳小為六極壽命促朝夕有一於此皆非富
貴之相

六反

六反謂頭面耳鼻口腹六者反常而不得其宜也訣曰
頭雖大額無角目雖大神閃爍鼻雖大梁柱弱口雖大
語略綽耳雖大無輪廓腹雖大近上著蓋頭大則要有
角目大則光正不流耳大則輪廓分明鼻大則梁柱要

高口大則聲要清壯腹大則勢要下垂其或反此則必是貧賤之相

氣色論

一行禪師曰氣色凡有七青黃赤白黑紅紫是也凡在於雞鳴之後平旦之前當血氣未亂飲食未進神色未雜人事未接正身端坐不可洗面漱口凡見於面部者自然之氣也以燭照之自上至下見於面部察其氣色定其吉凶夫氣色朝出于面部暮歸于肺腑狀有大小

或如碎米或如長釘或方如印或圓如珠或如浮雲之
狀或如飛鳥之形青色主憂驚黃色主吉慶黃屬土四
季各旺十八日又為胎養之氣故為吉慶之福德也赤
色主血光口舌白色主折傷孝服黑色主牢獄死亡之
事青色初起如井邊青苔盛如銅青之暈去如美草之
色黃色初起如蚕吐絲盛如蚕繭之絲來如黃馬牛之
色去如桃花瓣赤色初起如火來盛如研開硃砂去如
蓮花葉累累白色初起如脂膏抹又如塗粉去如垢泥

也黑色初起散如馬尾來如濕灰色去如塵污也四季以旺相休囚定人之休咎如春三月青旺赤相黑休白囚黃死之類

隆準龍顏

史記

漢高祖隆準而龍顏美鬚髯左股有七十二黑子

鳳姿日表

唐書

唐太宗生四歲有相者謁高祖曰公相法貴人也必有貴子及見太宗曰龍鳳之姿天日之表必能濟世安民

龍瞳鳳頸

唐書

袁天綱見武后母曰夫人相法生貴子后幼姆抱以見
紹以男天綱視其步與目驚曰龍瞳鳳頸若為男當作
天子

虎頭燕頤

後漢書

班超詣相相者曰當封侯萬里之外問其狀曰燕頤虎
頭飛而食肉萬里侯相也後封定遠侯

龍額上五柱入頂

隋書

隋文帝楊堅龍額上有五柱入頂有文在手曰王字長上短下相者來弘謂帝曰公當為天子後果然

髮際四道已成

晉書

石勒賣為奴有老父謂勒曰君魚龍髮際上四道已成當貴為天子忽然不見勒後僭位

鵠目虎吻

漢書

王莽為侈口顰頤露眼赤睛大聲而嘶長七尺五寸反膺高視瞰臨左右有方技待詔黃門者或問以莽形貌

待詔曰所謂鴟目虎吻豺狼之聲者也故能食人亦當為人所食

骨類多遜

魏泰

寇萊公十九及第有相者曰君相甚貴骨體類盧多遜但及第太早恐不善終若早退庶免深禍

眼似王敦

邵伯溫

李承之在仁宗朝官州縣因邸吏報包拯拜參政或曰朝廷自此多事矣承之正色曰包公無能為今知鄞縣

王安石眼多白甚似王敦他日亂天下者此人也

寢熟可相

百家詩篇

蘇子美謫居吳門有相僧子美謂之云侯寢方可觀子美一日熟睡僧揭帳視之但云來得也曷吳人語甚為曷子美扣之乃曰得一州縣官肯起否子美意復召用聞之不樂果復湖州長史而卒

奴有侯相

史記

衛青為所生父鄭季牧羊至甘泉居室有鉗徒相青曰

貴人也官至封侯青笑曰奴之生得無笞罵足矣安得封侯事乎後擊匈奴封關內侯

當刑而王

史記

黥布姓英氏少時客相之曰當刑而王及壯坐法黥布欣然而笑曰人相我當刑而王幾是乎

裴晉公陰德

王保定

裴晉公質狀耿小有相者曰郎君若不至貴即當饑死一日遊香山寺有婦人以父避罪假得玉帶二犀帶一

以賂津要致於欄楯忘收而去度得而授之後見相者
曰必有陰德及物前程萬里非某所知也

柳渾篤學

唐書

柳渾十餘歲有巫告曰兒相夭且賤為浮屠可緩死諸
父欲從其言渾曰去聖教為異術不若速死學愈篤後
至宰相

耳白於面

蘇軾

歐公嘗曰少時有僧相我耳白於面名滿天下唇不著

齒無事得謗其言頗驗

大貴人

百家詩篇

陳瑩中嘗入朝已立班上御朝差晚早日照耀衆莫敢
仰視蔡京注目久而不瞬瑩中私謂中省曰此公視日
不瞬乃大貴人也

伏犀貫玉枕右輔澤而動

唐書

袁天綱見竇軌曰君伏犀貫玉枕輔角全起十年且顯
立功在梁益間後軌為益州行臺僕射天綱復曰赤脉

貫瞳方語而浮赤入大宅公為將必多殺願自戒軌果
坐事見召天綱曰公毋憂右輔澤而動不久必還果還
為都督

蘭臺學堂全

唐書

袁天綱相杜淹曰公蘭臺學堂全且博將以文章顯後
淹以侍御史為學士

速登者易顛

唐書

高智周郝處俊來濟孫處約客石仲覽家仲覽使相工

視之工語曰高之貴君不及見來早顯而末蹟却顯而壽吾聞速登者易顛徐進者少患後濟等皆顯

語遲者神定

唐書

楊士琰生數歲未言相者視之曰語遲者神定必為重器

李固足履龜文

後漢書

李固頂角匿犀足履龜文後為太尉

面長而身短

五代史

五代桑維翰為人醜怪身短而面長常臨鏡自竒曰七尺之身不如一尺之面後至相

面偏而喉骨高

司馬光

初王旦與錢若水同直史館有僧善相謂若水曰王舍人他日位極人臣富貴無比若水曰王舍人面偏而喉骨高如何其貴也僧曰作相之後面偏自正喉骨高者主自奉養薄耳後果如言面自正

手摩重瞳

傳燈錄

廬山智常禪師以目有重瞳遂得藥手按摩目皆俱赤
號赤眼歸宗和尚

指有豎理

晉書

相者謂陶侃曰君左手中指有豎理當為公貴不可言
侃以針刺決之見血洒壁上乃為公字後果如所云

河目龍額

袁天綱

孔叢子曰仲尼聖人之表河目龍額是帝皇之貌史記
孔子立東門人曰其額似堯其頂類臯陶其肩類子產

然自腰以下不及禹三寸身長九尺六寸纍纍若喪家之狗鈎命決曰仲尼海口言養食海澤也

河目海口

宋史

洛人陳去非河目海口大耳聳峙識者知其為貴人也
徽廟時為參政

聖賢異貌

淮南子

堯眉八彩舜目二瞳子禹耳三漏文王四乳臯陶馬喙

三漏有三穴也

手相甚貴

魏泰

王克正仕江南歸本朝直舍人院及死無子其家修佛事唯一女十餘歲跪爐於像前會陳搏入吊出語人曰王氏女吾雖不見其面但觀其捧爐手相甚貴若是男子當白衣入翰林女子嫁即為國夫人後陳晉公恕為參知政事一日太宗從容問曰卿娶誰氏有幾子對曰臣無妻今有二子太宗曰王克正江南舊族身後唯一女令淑卿可作配晉公辭年高太宗敦諭再三遂納為

室不數日封郡夫人如陳之相也

蔡澤懷印

史記

蔡澤從唐舉相曰吾聞先生相李兌百日之內持國秉政有之乎曰有之曰若臣者何如唐舉熟視而笑曰君曷鼻巨肩顴頤蹙髑膝攣吾聞聖人不相殆先生乎蔡澤知唐舉戲之乃曰富貴吾所自有所不知者壽也願聞之唐舉曰從今以往四十三歲澤笑謝而去謂其御者曰躍馬疾驅懷黃金之印結紫綬於腰揖讓人主之

前食肉富貴四十三年足矣

劉備自顧見耳

三國志

劉先主身長七尺五寸垂手下膝自顧見其耳

錢若水無仙骨

釋文瑩

若水少時謁陳搏求相陳戒曰過半月來至期陳邀入山齋中一老僧擁衲附火于爐若水揖之其僧開目而視若水頗嫌之默坐久之陳問僧曰如何僧搖頭曰無此等骨既而若水起陳戒曰三兩日却來若水如期往

陳曰吾始見子神氣清粹謂可學神仙然見之未精不敢奉許特召此僧決之渠云子無仙骨位可作貴公卿耳問僧何人陳曰麻衣道者也後若水遇異人傳相法其事甚怪公後復以傳楊大年故世稱二人有知人之明

食胡漢祿

釋文瑩

真宗為開封尹呼一術者且瞽令張者夏守贇楊崇勳輩揣聽聲骨或中或否至王繼忠瞽者駭曰此人可訝

半生食漢祿半生食胡祿真宗笑而遣之繼忠復為高陽總管咸平六年與虜戰遂陷虜虜以其姿儀雄偉以女妻之偽封為吳王改姓邪律終於虜

鬼貌藍色

唐書

唐盧杞體甚陋鬼貌藍色不耻惡衣菲食

桓溫似劉琨

晉書

初桓溫自以雄姿似宣帝劉琨之流北伐還得一巧作老婢訪之乃琨妓女也一見溫潛然而泣溫問故答曰

公甚似劉司空溫笑出外整理衣冠入呼問婢云面甚似恨薄眼甚似恨小鬚甚似恨赤形甚似恨短聲甚似恨雌溫於是褰冠解帶昏然而睡不怡者數日

蝟毛磔

晉書

劉掞稱桓溫眼如紫石稜鬚作蝟毛磔

周亞夫餓死法

漢書

周亞夫為河內守許負相之曰君後三歲而侯侯八歲為將相貴重矣後九年而飢死亞夫笑曰貴如負言又

何飢死負指其口曰從理入口此飢死法也後有罪入
廷尉不食五日嘔血死

鑿玉枕骨

異記

唐杭州獄吏凌華遇相者曰能捨吏當為上將軍華為
吏酷暴以取賄元和初病一夕死見黃衣使宣牒云華
昔宰劇縣甚著能績後有缺行謫官園扉俟其循省大
乖乃心玉枕歸然委於庸賤付司追鑿玉枕骨送上俄
有執刀斧琢其腦華既醒捫其腦而骨亡後十五年暴

卒

眇刀

晉書

歷陽陳訓相甘卓曰頭低視仰相名眇刀目中赤脉自外入必兵死後果為王敦所殺

日角龍廷

唐書

唐儉說秦王建大計高祖嘗召訪之儉曰公日角龍廷姓協圖讖係天下望久矣若外嘯豪傑北招戎狄右收燕趙濟河而南以據秦雍湯武之業也

貴不可言

五代史

後同

術士崔玄豹以相法言人事多中莊宗尤信重之以為
北京巡官明宗為內衙指揮使安重誨欲試玄豹乃使
他人與明宗易服而坐明宗於下坐玄豹相之玄豹
曰內衙貴將也此不足當之乃指明宗于下坐曰此是
也因為明宗言其後貴不可言明宗即位思玄豹以為
神召至京師趙鳳諫曰好惡上所謹也今陛下神其術
而召之則傾國之人皆將奔走吉凶之說明宗遂不復

名

骨法非常

文穆王元瓘淮將李濤寇錦衣軍命王討之自是日者
視王曰此人手及百人當大貴有僧自新常衣紙依住
廣德山院聞元瓘至舉衆皆遁而自新巍然晏坐軍中
有問其故曰前後左右皆兵耳將安適時王在衆中新
乃歛衣奉迎與語久之及師還遂載而歸後王問新當
時何以見識答曰微僧無他術但覩王骨法非常故幸

得識矣

五代錢鏐縣錄事鍾起有子數人多竊從之遊豫章人有善術者望斗牛間有王氣牛斗錢塘分野因遊錢塘陰求其人私謂起曰占君縣貴人求之市中不可得視君之相貴矣然不足當之鏐適從外來見起反走術者望見之曰此真貴人也召至熟視之顧起曰君之貴因此人乃慰鏐曰子骨法非常願自愛

神人狀

九國志

吳殷文圭舉進士塗中遇一隻目文圭久之謂人曰向者一人眉綠拳必入口神仙狀也如學道當沖虛不爾有大名於天下而文圭拳實入口乾寧中擢第

額文似王

唐書

桓良器父友王奐為光弼從事見之曰爾額文似淮南王面黑子似顏平原殆能立功乃薦之光弼

識清貌古

唐書

韓思復初鄭仁傑李無為者隱居太白山思復少從二

人遊嘗曰子識清貌古恨仕不及宰相也

面如虎

唐書

袁天綱謂韋挺面如虎當以武處官

真將軍

左傳

後同

姑布子卿善相見無恤曰真將軍也趙簡子曰是子其母賤翟婢也奚道貴哉子卿曰雖賤必貴

豐下有後

叔服來聘公孫敖聞其能相人見其二子焉叔服曰穀

也食子難也收子穀也豐下必有後於魯

龍犀入額角

晉書

後同

朱建平相書曰額有龍犀入髮左角日右角月者王天下

功名壽年

周訪遇善相者陳訓謂訪與陶侃曰二君皆位至方岳功名略同但侃上壽訪下壽優劣有殊

孺子有好相

羊祐字叔子遊汶水濱父老謂曰孺子有好相年六十建大功既言便出莫知所在

奇麗福父

唐書

李勣臨事選將必先相其奇麗福父者遣之或問其故答曰薄命之人不足與成功名

面部三無

金華子

李寬為常侍有門下士姓盧善相或問李公如何曰據其面部所無者三無子無宅無塚公有數子皆先公卒

有宅未嘗還鄉居死于他州乘舟歸舟破沉骨

虎狀豺聲

左傳

楚子良生子越椒子文曰是子也熊虎之狀豺狼之聲
必殺之否則必滅若敖氏矣鬼猶求食若敖氏之鬼不
其餒而後果滅之

亞夫下獄相

陸游

南唐宋齊丘微時日者相之曰君貴不可言然亞夫下
獄君實有之位極之日當早引退庶幾保全齊丘登相

位數載致仕復以大司徒就徵未幾坐陳覺謀于紀事
乃賜死

攬鏡知形

白居易

蜀張裕曉相術每舉鏡視面自知刑死未嘗不撲之於
地後為劉備所殺

肉不稱骨

唐書

袁天綱視岑文本曰學堂瑩夷眉過目故文章振天下
首生骨未成自前而視法三品肉不稱骨非壽兆也

相術之難

戴埴


戴埴鼠璞曰唐定命錄李嶠昆弟皆年三十卒母憂之問天綱答曰神氣清秀壽苦不永又請連榻而寢視嶠睡無喘息候其出入在耳中遂賀曰必大貴壽是龜息也廣異記云魏元忠謁張憬藏待之甚薄問通塞不答公怒拂衣去藏遽曰君相在怒中當位極人臣袁張天下奇術也袁非得之睡將以壽為夭張非得之怒將以貴為賤見人於目睫間欲斷平生禍福誠難又有因人

事而變者如芝田錄載葫蘆生始不許裴中立貴後因還婦人所遺寶帶謂近種陰德位極人臣遜齋閒覽載胡僧始言大宋不得甲科後因渡蟻謂丰神頗異如曾活數百萬命小宋今歲首捷公不出其下今人盡以禍福委之定命可乎

張齊賢漕江南日以書薦王冀公欽若於錢希白錢時以才名獨步館閣適延術士以考休咎不容通謁王跼蹐門下厲聲詬閤人街者遙聞之謂錢曰此不知何人

若聲形相稱世無此貴者但恐形不副聲爾願延入使
某一見希白名之冀公單微遠人神貌疎瘦復贅於頸
而舉止山野希白蔑視之術者悚然側目諦視既退稽
顙稱歎曰人中之貴有此十全者希白戲曰都堂便有
此等宰相乎術者正色曰公何言歟且宰相何時而無
此君不作則已若作則天下富盛而君臣相得至死有
慶而無弔不完者但無子而已希白曰他日當陶鑄吾
輩乎術者曰恐不在他日願公無忽後希白方為翰林

學士冀公已真拜



稗編卷六十六